



**Sud Bosne i Hercegovine
Sud Bosne i Hercegovine**

**Broj: S1 3 Iž 03854620 Iž
Sarajevo, 30.10.2020. godine**

Sud Bosne i Hercegovine u Sarajevu, u apelacionom vijeću sastavljenom od sudija, Vesne Trifunović, predsjednice vijeća, Srete Crnjaka i Mirsade Džindo, članova vijeća, odlučujući o žalbi žalitelja Borislava Mijočevića, Horvaćanska cesta 166, 10000 Zagreb - Hrvatska, izjavljenoj protiv Odluke Centralne izborne komisije Bosne i Hercegovine broj 05-1-07-1-998/20 od 1.10.2020. godine o odbijanju upisa u izvod iz Centralnog biračkog spiska za glasanje van BiH za Lokalne izbore 2020. godine, u nejavnoj sjednici održanoj dana 30.10. 2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje van BiH za Lokalne izbore 2020. godine za ukupno 27.960 birača po prijavama podnesenim do 1.9.2020. godine, zbog neispunjavanja uslova iz odredbi člana 3.15 stav 1., 2. i 3. Izbornog zakona BiH, među kojima se nalazi i žalitelj.

Protiv ove odluke žalitelj je blagovremeno uložio žalbu. Navodi da nije uvršten na popis birača za glasanje izvan BiH zbog više od 6 osoba prijavljenih na istoj adresi. Navodi da je na adresi: Horvaćanska cesta 166, Zagreb prijavljeno 6 osoba, te traži da da mu se dozvoli glasanje izvan BiH sa navedene adrese.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci kao nedopuštena, odnosno odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Odredbom člana 5.21 stav (1) Izbornog zakona BiH („Službeni glasnik BiH“ broj 23/01 do 31/16), propisano je da CIK BiH utvrđuje proceduru i način glasanja izvan BiH. To je precizirano odredbom člana 21. Pravilnika o vođenju Centralnog biračkog

spisak („Službeni glasnik BiH“, broj: 32/16) kojim je propisan sadržaj obrasca za prijavu za glasanje izvan BiH (PRP-1) a tačkom g) iste odredbe propisano je da adresa koju birač prijavljuje kao adresu izvan BiH uključuje i kontakt podatke: ulica i kućni broj, c/o (podaci o licu kod kojeg boravi birač), grad poštanski broj, država, broj telefona i e-mail adresa.

Centralna izborna komisija Bosne i Hercegovine (CIK BiH) je, prema stanju u spisu, pravilno utvrdila da je u obrascu prijave za glasanje izvan BiH (PRP-2) podnesenoj na ime žalitelja, navedena adresa izvan BiH na koju će biti dostavljen glasački materijal: Gredice 153, Zagreb - Hrvatska, dakle ista adresa za dostavu osjetljivog glasačkog materijala za 6 lica, prijavljenih kod istog stanodavca da glasaju putem pošte.

Cik BiH je, prema stanju u spisu, na osnovu potpuno i pravilno utvrđenog činjeničnog stanja izveo i pravilan zaključak, da bi dostavom osjetljivog izbornog materijala na istu adresu bilo povrijeđeno osnovno izborna načelo, tajnost glasanja i izbora direktno od strane birača, koje garantuje odredba člana 1.3 Izbornog zakona BiH.

Takođe, i po stanovištu suda, činjenica da je ista adresa u prijavi za dostavu glasačkog materijala za žalitelja i još 5 lica, da žalitelj nije dostavio dokaz o prebivalištu na navedenoj adresi, da je žalba dostavljena sa e-maila različitog od onog navedenoj u prijavi, kao i da žalilac u žalbi navodi drugu adresu (Horvaćanska cesta 166, Zagreb), a ne onu koju je naveo u prijavi (Gredice 153, Zagreb), ukazuje na mogućnost organizovanog djelovanja pojedinaca ili grupa na zloupotrebi biračkog prava, te da izborni inženjering manifestovan na navedeni način može uticati na izborni rezultat na predstojećim Lokalnim izborima 2020. godine.

Nužno je istaći da žalioocu nije oduzeto biračko pravo za Lokalne izbore 2020. godine, nego samo mogućnost da glasa putem pošte izvan BiH, s tim da će moći glasati na redovnom biračkom mjestu u Opštini u kojoj ima prijavljeno prebivalište u Bosni i Hercegovini.

Iz navedenih razloga Apelaciono vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

**PREDSJEDNICA VIJEĆA
S U D I J A**

Vesna Trifunović